

Wakil Rakyat Sabah Dicadang Isi Jawatan Timbalan Menteri Perumahan Dan Kerajaan Tempatan
Bernama
2 Ogos, 2012

KOTA KINABALU, 2 Ogos (Bernama) -- Timbalan Ketua Menteri Sabah Datuk Seri Yahya Hussin berpendapat wakil rakyat dari Sabah wajar dipertimbangkan untuk mengisi jawatan Timbalan Menteri Perumahan dan Kerajaan Tempatan bagi menggantikan Datuk Seri Lajim Ukin.

Bagaimanapun, beliau berkata terpulang kepada Perdana Menteri Datuk Seri Najib Tun Razak untuk memutuskannya.

"Kalau diberi kepada (wakil rakyat) Sabah lebih baiklah," katanya kepada pemberita pada majlis pengagihan Tangki 1Malaysia Daerah Putatan di Dewan Serbaguna Putatan, di sini, pada Khamis.

Pada Selasa lepas, Yang di-Pertuan Agong Tuanku Abdul Halim Mu'adzam Shah memberi perkenan terhadap pembatalan pelantikan Lajim sebagai Timbalan Menteri Perumahan dan Kerajaan Tempatan.

Sementara itu, Sabtu lepas, Datuk Seri Lajim Ukin mengumumkan meletakkan jawatan sebagai anggota Majlis Tertinggi Umno, Ketua Umno Bahagian Beaufort dan Pengerusi Barisan Nasional (BN) Beaufort berkuat kuasa serta-merta. Beliau bagaimanapun masih kekal sebagai anggota Umno.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=685014>

